

EDITORIAL

Jossy M. Mansur



TRES ALTERNATIVA

Ayer, Gobernador a informa Glenbert cu e no por huramente debi na e cantidad di casonan cu tin bao investigacion relaciona cu su carteranan. Aunke den nos sistema tur hende ta inocente te ora nan ser haya culpable den un Corte di Justicia, parce cu den e caso di Glenbert e consideracion basico aki no ta conta. Otro atributo mas cu Hulanda ta usurpa cu e bendicion di e entreguistanan pa usa contra esnan cu no ta cay e bon.

Señorita Justicia cu ta ser simboliza pa un statua cu un lenso mara rond di su wowonan pa haci comosifuera Justicia ta ciego, basta tempo caba a ranca e pida paña benta afo pa mira bon cla ta ken ta para su dilanti.

Pero tin cosnan ainda mas fundamental cu e odio di Hulanda contra cierto hendenan na Aruba, of un sorto di Justicia sin lenso y cu wowonan cu parce mas bien dos lens di un potente binocular. Localmente, política a determina e no-aceptacion di Glenbert. E odio di Hulanda y e no-ceguera di Justicia ta e crema riba e bolo. E bolo mes a ser traha den e cushina di Henny na Cas di Partido.

E nombramento di Mary tabata e obra maestro di un politico bakiano cu a dal OLA un bofta cu e seguridad cu e no ta bay haya contesta. Glenbert y Lili a guli manda abao mansamente. Nan no a ni sikiera protesta, pa no stoba nan entrada den Gobierno, gafiando nan mes cu Henny a hacie pa mantene e filanan di su partido na linea y no pa pasa nan un wanta formal. Nan tabata ekiboca.

A bin acerca e huramentacion di Glenbert, cu Henny tabata sa masha bon cu no tabata bay tuma lugar, pasobra ta e mes a fiha e reglanan di e wega den combinacion cu Hulanda. Asina mes el a asegura su futuro socio cu e ta para su tras, el a monta un drama formal na Cas di Cultura cu a termina den un respaldo superficial pa desarma Glenbert. Esaki ingenuamente a acudi manera un lamchi na e abatoir di Gobernador. Ey, el a averigua cu Henny a pase otro strike. E di dos, y esun definitivo.

E wega tabata arma for di un principio, y tin un motivacion politico poderoso su tras: dos asiento cu ta hala e mirada di Henny manera un magnet. Si Glenbert no a forma Gobierno cu AVP pa boluntad propio, ainda e tabata tin e oportunidad di crece hopi den un eleccion. Pero, guliendo e prome bofta di Mary, pa djey kere den su socio y bay Gobernador asumiendo cu "algo" tabata bay pasa pa converti su huramentacion den un realidad, el a comete e imprudencia di ofrece su mes voluntariamente pa e di dos golpi.

Henny tabata sa cu no tabata posible pa e ser nombra, pero di tur manera a haci Glenbert kere cu tabata tin un chance pa e sosode.

Pakico? Pasobra Henny ta haci su calculonan bon, cu un cabez frio, sin ningun clase di sentimento. Pe, ta politica ta manda, y asina el a arma e trampa pa Glenbert. Si Glenbert no a acepta e nombramento di Mary, e lo a sali ri e compromiso gubernamental frente na laira, parando den su zapatonan. Pero, el a guli e prome pildora cu demasiado suavidad. Ey, Henny a sinti su debilidad, pesey el a bay pa e remate, convenciendo Glenbert cu, contando cu su apoyo, e tabata tin chance di ser nombra.

Glenbert no a tuma na cuenta e historia di Henny cu e partidohan chikito. E no a para analiza loke a pasa cu ADN, PPA, PDA y AD86. Si el a studia e historia ey bon, e lo a siña e les.

Na momento cu e decision a keda den man di Gobernador, Henny tabata sa cu el a sali triunfante. Mescos cu Pontius Pilatus a presenta e Nazareno na un publico di fariseo, sabiendo cu nan ta bay scoge Barabas, Henny a forza Glenbert den man di Gobernador. Pilatus a laba man den un ponchera di plata o di ceramica, Henny a laba man den e ponchera di Gobernador. Saliendo derota for di e enfrentamento cu Gobernador pa su huramentacion, Glenbert su carera politico a sufri otro golpi. Henny a concebi e plan pa debilita Glenbert den proximo eleccion pa e bay pa un di su dos asientonan.

Atrobe mester kita sombre pa Henny. El a conta cu e respaldo directo di Hulanda pa saca Glenbert for di caminda y el a logre, no pasobra Hulanda o Henny, o nan dos combina, ta mihor estrategia cu otronan na Aruba, sino pasobra nan a haya den Glenbert un victima voluntario, mucho credulo, cu a pone su deseonan di bolbe bira Ministro riba sentido comun y tur e consehonan cu el a ricibi di kendenan kier e bon.

Keriendo cu e ta tratando cu un politico habil so, el a topa cu uno maestro di malicia. Si Glenbert tabata scucha, e no lo a presenta na Gobernador ningun momento pa ricibi e golpi di gracia. E tabata tin mucho mehor chance den eleccion si na momento di e nombramento di Mary el a habri afo contra AVP y bandona e idea di bolbe sinta cu nan den Gobierno.

Awor cu e cartanan ta hunga, a keda tres alternativa: OLA ta hala atras di su compromiso di drenta Gobierno solamente si su dos candidatonan pa Ministro ser aproba y ta presenta otro candidato na lugar di Glenbert; ta bin un Gabinete profesional (Zakenkabinet); of ta bin eleccion. OLA mester para tras di su lider, sino e ta cay hunto cune. Ni AVP ni OLA ta sinti pa un Zakenkabinet, y aunke ningun di e tres partidonan ta sinti pa eleccion, esey ta keda como e alternativa mas real entre nan tres na e momentonan aki.

Pruebanan cu Corte Supremo ta haya ilegal lo worde usa na Merca contra Randy Habibe

ORANJESTAD (AAN) -- Tin indicacion cu autoridad na Merca no lo respecta e decision di Corte Supremo cu e pruebanan cu a presenta contra Randy Habibe pa su extradicion ta ilegal. Autoridad na Merca lo usa e pruebanan aki den Corte contra Randy Habibe.

No ta por nada abogado mr. Swaen den e caso sumario di urgencia cu a tuma lugar di abicirna merdia den Corte a bisa cu mester tin garantia di Merca cu no lo usa e pruebanan cu Corte Supremo a haya ilegal contra Randy Habibe na Merca.

Investigacion cu DIARIO a haci ta muestra cu Merca a laga sa caba cu nan lo usa e pruebanan aki contra Randy Habibe.

Corte Supremo, despues di a evalua henter e proceso con e razanan riba propiedadnan di Randy Habibe a tuma lugar na Aruba, a dicidi cu e forma con a haci e investigacionnan no ta correcto y pesey no por usa e pruebanan aki contra Randy Habibe o sea nan ta ilegal.

Corte Superior correctamente a manda pidi pruebanan adicional pa hustifica e pruebanan cu mester tin pa honra e peticion pa extradicion.

Na dado momento a sosode cosnan cu te dia di awe ta inescapabel. Merca a keda sin manda mas prueba y tampoco no a manda e garantia cu Corte Superior a pidi caminda Merca ta garantiza cu asina un Arubiano extradita haya su castigo e ta re-

gresa Aruba pa sinta su castigo aki.

Procurador General mr. van Dalen a sali totalmente na defensa di autoridad Mericano mostrando cu no mester a laga Corte Supremo dicidi riba e pruebanan sino na Merca mes por a haci esaki. Tambe el a bisa cu Merca tin miedo di manda su ultimo pruebanan cu nan ta considera nan ultimo cartanan cu nan lo usa den Corte. Mr. van Dalen a presenta cu un nota diplomatico di 1992 y aki ta caminda cu tur cos a bira 360 grado.

Corte Superior despues di a haya e nota diplomatico aki, a haya cu tin suficiente prueba y a conseha pa extradita Randy Habibe cual a sosode tambe.

Investigacion cu DIARIO a haci ta muestra cu e asunto aki no a caba ainda. Abogadonan mr. Swaen y mr. Kock a cumansa un caso den Corte Supremo mientras cu na Aruba nan lo sigui cu mas caso entre otro "bodem procedure" caminda lo bay analisa e caso mas profundo.

E pregunta ta, kico lo pasa si Corte Supremo haya cu no mester a extradita Randy Habibe? Gobierno di Aruba lo por manda pidi Randy Habibe bek?

Si Merca condena Randy Habibe a base di e pruebanan haya ilegal, kico Corte Superior na Aruba lo haci ora Randy Habibe regresa Aruba pa sinta su castigo aki? Corte Superior lo bay condena Habibe a base di pruebanan cu Corte Supremo a haya ilegal?

Esakinan ta algun preguntanan cu ta surgi ora analisa e caso. Ta di lamenta cu ta extradita yunan di tera SIN cu henter e asunto di extradicion di realmente regla. Ta parce cu lo usa esnan cu a worde extradita como prueba pa mira si tur cos ta bon y si cosnan faya e ora ey lo bay mira con lo drecha esakinan. Esaki sigur no ta e forma correcto pa trata hende en especial yunan di tera. Lo tabata muho mas mihor pa gobierno a prepara tur cos debidamente cu tur hende sa con nan ta para y kico ta nan derechonan, envez di siegamente bay di acuerdo cu e ley di extradicion cu Hulanda a firma cu Merca caminda e Hulandes Europeo tin mas derecho cu e Hulandes Arubiano.